

山西通志卷第一百四十一

山西巡撫都察院右副都御史臣覺羅石麟奉

旨修輯

孝義

洪範以攸好德爲五福之一蓋好德之人皇則錫之福惟孝惟義順德也我

國家敦崇實行所以牖世覺民者備至又特著

令典忠孝節義各建專祠或大節彌昭或幽光待發胥受福無艾矣山西爲唐虞舊俗沐化最深今有履孝秉義可以示勸者固天性使然而

聖朝斂五福以錫庶民之德厚澤深仁可想見焉志孝義
太原府

漢

馮魴王莽末虞都尉及殺申屠季兄謀滅季族季亾歸魴魴將季歸逢尉弟長卿欲執季魴叱曰我與季雖無素故士窮相歸要當以死任之遂與季歸季謝曰蒙恩得全無報牛馬財物悉以獻公魴作色拒之季慚不復言光武聞而嘉之徵拜虞令歷官司空賜爵關內侯

郇越少明經飭行平帝時州郡舉孝廉茂才後以病去官嘗散貲十餘萬施九族州里志節甚高顯名於世子恁有清節屢徵不起

溫壽序子爲鄒平侯相棄官乞序骸骨歸葬光武嘉其孝許之

晉

田蘭并人晉有汲桑者力能扛鼎殘忍少恩六月盛暑重裘
使十數人扇之忽不清涼便斬扇者大姓田蘭斬於平原
士女慶賀奔走道路而歌曰士爲將軍何可羞六月重裯
被狐裘不識寒暑斷人頭雄兒田蘭爲報讐中夜斬之謝
并州

南齊

孫淡太原人居長沙事母孝母疾淡廢眠食以瘳爲期恐母
哀之不使知也豫章王領湘州拜驃騎行叅軍建元三年
蠲其租稅表其間里

北魏

王元遜祁人從父應援守潁川城陷遂罹害

隋

韓子誕文水人親沒負土築墳居喪盡禮詔旌其孝及卒視其脊骨皆毀大業末表其門閭唐貞觀中蠲其賦役

郭世雋字宏文一作郭雋文水人家雍睦七世同居犬豕同乳烏雀同巢時人以爲義感事聞文帝遣平昌公宇文弼詣其家勞問侍書御史柳彧巡省河北旌其門閭漢王諒爲并州總管聞而嘉之賜其兄弟二十人衣各一襲

張道源祁人年十四居父喪盡孝縣令郭湛署所居曰至孝里隋末政亂辭監察御史歸後仕唐歷秋官尚書進封南陽侯

唐

武宏度文水人補相州司兵叅軍永徽中父卒自徐州被髮徒跣趨喪所負土築塋晨夕號日一溢米素芝產廬前狸

擾其旁下詔褒美旌其門

王士昊太原府人節度使令狐楚奏狀曰右臣得太原府牒前件人爲母阿張患病割股奉母其母所得疾漸損者臣伏以登於大孝在禮爲難忍其甚痛於人不易王士昊長於市井利在錐刀誓以誠明之心療其羸老之疾割肉於股饋羹於堂信可以感通神明風變人俗某猥司廉察獲守方隅以此至性恐須旌表

馮秀誠榆次縣人節度使令狐楚奏狀曰右臣得太原府牒前件人爲母久病割股奉母所疾漸損者臣差當縣主簿劉戡檢驗得狀具如前申者臣伏以縱螫及膚口猶難忍援刀刺骨心豈易安前件人出於畎畝之中長在草茅之下天生仁孝日用元和忘甚痛於已軀期有瘳於親疾人

倫其感名教所宗斯實陛下仁奄周王孝逾虞帝陶蒸動物之性啟廸仁人之心况臣守在方隅職司廉察據其至行恐合褒稱

王燾珪孫性至孝爲徐州司馬母有疾躬奉湯劑彌年不廢帶數從高醫游遂窮其術因著外臺秘要討繹精明世寶焉歷給事中鄴郡太守治聞於時

溫振中書令彥博之子少有雅望官至太子舍人居喪以哀毀卒

盧遺仁王知道胥太原人事親居喪著孝行旌表門閭賜粟帛州縣存問復賦稅

五代

張鄴太原人叔父憲爲莊宗魏博推官王師與梁師戰不利

憲奔馬北渡梁軍急追殆將不濟至晚渡河人多陷水而沒憲與郎履冰而行將及岸冰陷郎號泣以馬垂引之憲曰吾兒去矣勿使俱陷郎曰忍覩季父如此俱死無恨郎偃沐引垂憲躍身而出是夜莊宗令於軍中求憲或曰與王緘俱沒矣莊宗垂淚求尸數日間其免也遣使慰勞

宋

劉孝忠并州太原人母病經三年割股肉斷左乳以食母母病心痛劇燃火掌中代母受痛母尋愈後數歲母卒傭爲富家奴得錢以葬富家知其孝養爲已子後養父失明舐之經七日復能視劉鈞聞而召見給衣服錢帛銀鞍勒馬署宣陵副使開寶二年太祖親征太原召見慰諭

金

王忠立岢嵐人妻亾不再娶結廬蘆芽山隱居終老

元

溫義祁人五世同居長幼無私財家庭無間言至元丙子旌

其門曰義門

姚相文水人捐立學田見邑志

明

程宗齊陽曲人性孝友親疾求以身代及卒悲悼廢食愛弟
宗望誓不析居常置義塚及園畦三百以贍族人子書亦
有孝行

白祥文水人父賁令長山以事連坐當刑祥願代之臨刑神
色不變成祖嘉其孝父子俱免大宥天下時銜祥恩者繪
像祀之

段廷用陽曲人奉孀母極孝母故日夜悲號旣葬於墓側起茅屋枕苫飯蔬敝衣垢面歲饑盜不忍驚害種瓜麥雙岐並蒂人以爲孝感云

周紳陽曲人事孀母姜圖刀圭以奉甘旨侍疾送終胥如禮結廬墓側盜賊相戒勿驚

程書陽曲人父宗齊母張氏書朝夕奉養父中濕衣不解帶延八月竟不起哀毀骨立事母彌孝敬鄉評重之舉於官綽楔表門

李慎鍛晉靖安王長子幼好詩書敦孝道奉兩尊承顏順志性若天成母妃盧疾危呼天割股以進後又因盧病晨夜侍疾求以身代及母愈因過勞成疾而卒

馬謖太原人父早逝事母器用飲食精潔或自斑舞令諸婢

觚角歌呼以悅親心日取厠褊躬自浣滌母登大耄喜不勝懼祝天以已算益之及施濟無告哺育棄兒以祈母壽母卒飲食胥廢葬畢以哀思亾

王英太原左衛人少孤育於祖母病刲股以進尋愈登成化鄉試授滕縣令有惠政陞登州府通判

陳舉太原左衛人事嫠母至九旬孝思愈篤母卒廬墓三載舉時年已七十矣

趙定太原前衛人兄宥遘難鬻所居以助之一夕竊者入其室善言勸諭慮爲邏者所獲天明始遣去子某登賢書

段廷宴太原貢士任撫寧縣令事親竭力居喪三年人莫覩其面

趙威晉太原人父本爲諸生游學威晉生未期歲及長以不

識父面爲恨言輒流涕遍詢僧道或告以在終南山卽
推小車覓之果得扶歸

趙洪遠太原人父珙母張自受飢寒竭力奉養巡按趙飭所
在給穀以示獎

劉玘臣太原人父病噎食百計求愈不得或以刲股可療從
之病果愈

程巖陽曲人孝事嫠母五十年如一日母亾所遺服飾分散
兄弟喪祭之費已獨任之

陳天壽陽曲人事嫠母至孝宗黨某某貪病且死醫藥殯歛
皆出其力又張珠夫婦遭疫人率畏避二子方脫襁褓攜
之以歸卒賴全活

趙復性榆次庠生以孝聞父卒號泣不食數隕絕及葬廬墓

草衣糲食終喪不忍離族人毀其廬載歸後旌表

劉陽插部內侵時未週歲母棄之祖母王道聞啼聲挾陽以歸王氏寡居四十餘年陽朝夕不離及歿圖形事之

韓朝花太谷人家貧業推小車出外必計往還日備飲食費以供父母出告反面跪拜問安始終不二聞妻少觸忤卽痛箠之

程文宿大谷人朴實不知書母疾祝天以已算益之母卒哀毀骨立廬墓三年又李元顯貢生事母至孝母卒茹淡三年

賈謨大谷人家貧業染母年七十逐日力養得美食卽以奉母母悅乃安

孫昂交城人父歿廬墓羣鴉悉集朝去暮來嘗之蒲州渡黃

河有老人同渡拽舟使獨後俄見前船覆溺昂乃得免
張浚明交城諸生事繼母撫羣從以孝友著

徐永詔交城人任韶州檢校年二十九妻張氏亾義不再娶
壽至八十有一

劉盈清源人童年知孝居喪哀毀踰禮母蘇病危刲臂肉以
進病尋愈

劉漸清源庠生少孤竭力事母母疾亟哀禱得仙方服之卽
愈

劉秉寬清源人母畢氏病刲股以進病卽愈一夕如聞母呼
驚覺出門屋梁隨折枕爲之碎弟秉暢悞傷人至死訟於
官寬憫其無子代受刑其人二日復甦遂得釋又王遠閭
海俱以廬墓稱孝

董玉常清源人置義田百畝於堯城鎮建買社學以育才惠
不責償人多高之又時輝牛昭蘇雲端荒年輸粟全活甚
多

孟養氣文水人事繼母撫諸弟以孝友著

張鳳翔文水舉人孝事嚴父父沒號泣蔬食三年又李玫王
府典膳事嫠母惟謹母卒廬墓盜不忍驚又胡誥邑庠孝
親廬墓所人皆稱爲孝子窩

郭拖字子福文水人性孝父廷詩好施與拖能繼之親疾禱
神求代歿則號泣廬墓年老無子夢神語曰爾孝德格天
當錫爾子果舉嗣應鰲應泰孫鉉俱以文行名

高智文水縣志作高階又李伯現又王鸞字鳴臯德量寬厚
強暴感化咸稱長者

鄭位爲文水諸生事繼母以孝聞友諸弟歲試赴汾州拾遺金悉歸失者性不喜飲鄉有忿爭率置酒解之家頗貧周給無倦色以子之僑貴三膺封又諸生王在庭拾還遺金又嚴應祥兄弟同爨五十載子國魁孫調鼎胥魁於鄉王景能祁人事孀母以孝聞孫天爵領鄉薦又渠永昌孝友累賓鄉飲壽至九十九歲又閻紹芳祖喪承重茹素三年又胡濂赴兄急難慷慨殺身

李瓚太谷人孝母宜家百口同爨曾獲盜乃素相識遂遺布疋遣之

李春茂嵐縣志作楊春茂孝事父母母歿事父尤謹直指某給粟以旌之

邱憲章嵐縣人力農好施與敦孝弟父疾步禱恒嶽不解衣

者旬月母疾籲天求代疾尋愈母卒哀毀不離柩旁不尚
佛事子瑀事父母及繼母曲承意旨以歲薦判簿岐山有
政聲係如翼亦有孝行又劉光旭貢生李大盛俱以刲股
愈親疾

溫和嵐縣歲貢判河間主簿祖希範早卒善事祖母張氏稱
順孫父錦卒事嫡母梁生母田以孝稱

郭安興縣人有孝行任陝西衛經歷前後廬墓六年有白鶴
旋繞之異又有諸生白孝古廬墓六年均奏得旌表又有
監生康玉潔諸生王朝冕及兄朝冠親死亦以廬墓稱孝
胡玉琴興縣人父博娶關氏生尚默次娶甄氏生玉琴甄病
兄弟並事之維謹及歿並廬墓側父歿琴復廬墓哭思成
疾卒妻劉氏年少撫孤稱節孝